

Dictadura di Burocracia

Pa: Roland W. Peterson

E ta december 15, 2011, y ami ta bay paga pa mi plachinan di number di auto.

Ontvanger ta recomenda esaki, pasobra e ora ey bo no ta perde hopi tempo otro aña den rij largo.

E articulo aki ta pasobra mi kier comparti mi experencia (aventura) cu bo.

Mi no ta culpa ningun hende, mi ta laga otronan husga pa nan mes.

Cos ta bon pa clientenan di Ontvanger na San Nicolas.

Ora mi a yega no tabatin ningun hende dilanti di e loketnan, dus mi turno tabata inmediatamente (1X).

Mi ta presenta mi documentonan na e juffrouw y mi a puntrele si nan ta acepta company checks. E ta bisa cu si, pero ora mi a cuminsa yena e check anto e ora ey e la bisa mi cu no por paga cu check. Mi ta conteste cu e ta un company check. E la sigui insisti, cu no por paga cu check. Ma asumi cu ta ami a compronde robes, y pesey mi a bay banco pa busca "cash".

Ora mi a regresa (2X) e juffrouw ta procesa mi documentonan y ta bisa mi cu mi mester regresa aki un siman, dus dia December 22, 2011.

Pero pa mi ta mas sigur pa no bin pornada, mi no ta regresa Diahuebs December 22, sino Diabierna December 23.

Ora mi ta bin na e loket di ontvanger pa busca e plachinan, e ta di (3X). E señor tras di e loket ta tuma mi documentonan y ta "tira" (schuif) un stapel documentonan bek bao di glas. "Esaki no ta bon" Dicon e no ta bon. "E seguro a caduca caba" Señor bo no a wak bon, e documento cu bo mester ta pagina dos. Renuent e ta tuma e stapel bek, sperando cu e por tira nan bek pa di dos biaha. Pero e la keda cu lip, pasobra e documento tabata bon. Cu desgana e la coy mi stapel y cu masha uh, uh, uh, e

ta bay patras pa busca mi plachinan. Despues di un rato cortico e la bolbe. "Plachinan no a yega, bin bek otro siman Diahuebs."

Dus Diahuebs, december 29, mi ta para dilanti loket atrobe, e ta di (4X). E ta 08:30 AM y ningun loket ta habri. Mi ta bay y ta bin bek 9.00 AM, awor e ta di (5X). Ainda ningun loket ta habri.

Banda di 9:30 AM porfin un juffrouw ta yega cu un caha yen di plachi di number di auto. Ora mi a reclama e juffrouw, e la contesta mi: "Ta parce cu tur hende kier nan plachinan awe. Nan ta laat, pasobra nan mester a bay busca tur e plachinan prome cu

nan bin San Nicolas.

Wel mi no ta culpa e juffrouwnan aki, pasobra nan no por yuda. Pero mi ta puntra mi mes: "Nan no tin un hefe?" Ta prome bes cu plachinan mester bin San Nicolas? No por a busca nan un dia prome of mas tempran e mainta ey? Pakico ta net hendenan di San Nicolas mester ta e perhudicadonan?

Pakico? Pakico? Pakico?

Awor mi ta number 11, y mi ta sinta ta wardando mi turno. Mi dilanti tin un señor cu ta reclamando pasobra su plachinan

no a yega, despues di un siman. E juffrouw tras di e loket ta yama e security guard y ta puntre, si e no por bay dilanti y pone e cabesnan di e hendenan cu ta reclamando, na "water pas".

Un señor sinta banda di mi, ta avisa mi pa no hisa mi bos, pasobra si "nan" tende mi anto mi ta core e risico cu ora mi turno yega "nan" ta bay bisa mi cu mi plachinan no a yega ainda.

Wel, wel ta esaki ta Aruba na fin di 2011.

Awor mi ta puntra mi mes, pakico haci tanto propaganda pa hende bin paga mas tempran, p.e. prome cu aña caba, pa asina evita rij largo y no perde tempo. Pero si bo mester bin bek loket pa cinco biaha, cual ta pio? Para den rij cu un "lunch packet" of bin bek cinco biaha, prome cu bo haya bo plachinan?

Unda nos "common sense" y servicio a keda?

E contesta mi ta laga e lesado mes dicidi, si e ta Dictadura di Burocracia?